

Удмуртиысь Писательёслэн огазеяськонзылы — 90 ар

# Кыл валтэ, кыл жүтэ

Удмуртиысь Писательёслэн огазеяськонзы пусйиз 90 ар тырмонзэ. Туннэ солэн радъёсаз пыро 100-лэсь трос писательёс. Юбилеен жечкыланы вуыліз Россиысь Писательёслэн огазеяськонзылэн кивалтйисез Николай Иванов.

## Жечсэ утыны капчи ой вал

Удмуртиысь Писательёслэн огазеяськонзы юбилейзэ көня ке пöртэм ужрадъёсын пусйиз. Нырысь ик, дасямын вал «90 лет служим Отечеству» альманах. Отчы 77 гожъяськисьёслэн вордскем музъем сярсь веросьёссы, кылбуръёссы пыризы, пöлазы егитъёслэн ужъёссы но. Радъямын вал гожъяськись нылпиос пöлын конкурсьёс. Писательёслэн огазеяськонзылэн правленияз пырысьёс ар çоже поталлязы ёросъёсы, пумиськылйзы отысь гожъяськисьёсын, профессиональной писательёсын но, школае ветлйсь нылпиосын но.

Огазеяськонлэсь юбилейзэ пусъён нунал озы ик çукнаысен бер жытозь пöртэм ужрадъёсын тырмиз. Дорамы нырысьсэ вуылйз Россиысь Писательёслэн огазеяськонзылэн кивалтйисез Николай Иванов.

Николай Фёдорович — писатель, журналист, драматург, офицер-десантник, 30-лэсь трос книгаослэн авторзы, улонлэсь пöсьсэ но, кезытсэ но трос адзем, ас вылаз шöдэм адыми. Ожгар журналист луыса пöртэм вакытёсы вуылэмын Чечняе, Цхинвалэ, Крымэ, Донбассэ, Сириэ... Россиысь Писательёслэн огазеяськонзыны Николай Фёдорович кивалтэ 2018-тй арысен.

Йöскалык библиотекаын Москваысь куноез чидатэк витизы асьме писательёс. Угось соослэн кивалтйисы трос гинэ сюлмаськытйсь юанъёссы вал. Кызы

### Россиысь Писательёслэн огазеяськонзылэн кивалтйисез Николай Иванов:

— Пумиськонъёс, кенешонъёс интыосысь писательёслы туж кулэ луо, милемлы но — огазеяськонмес юматон понна. Угось змос литература, змос улон лэсьтйське улосъёсын.



Калык поэтьёс луизы Пётр Захаров (паллянысез), Владимир Котков (бурысез), калык писатель — Ульфат Бадретдинов (шорысез).

Россиын али писательёс шоры учко? Кыче сюресъя мыноз Россиысь Писательёслэн огазеяськонзы? Луозы-а кыче ке воштйськонъёс? Писатель луонлэн данэз, дуныз будоз-а?

Николай Фёдоровичез туж сак кылйзы. Кивалтйсь нырысь ик тодаз вайиз 1990-тй арьёсты, куке огазеяськон пазгыське, тус-тас луэ ини вал...

Россиысь Писательёслэн огазеяськонзыны Николай Иванов кивалтыны кутскем бере югдур озы ик капчи ой вал. Берло арьёсэ огазеяськон пумен юмат. Кивалтйсь улосъёсы огазеяськонъёсын юн кусып возыны тырше, ачиз пумиськонъёсы пота.

Нялтас вераса, Николай Фёдорович пыре Россилэн Президентэз бордын ужась культура кенеше. Вуылэ спецоперацие пиосмы доры но. Меçак вера: али писательёслэн кыче но огазеяськонъёссы öвöл, но змос ужёсты учкиськод ке, адзöно, кинлы оскыны луэ. Туннэ нуналлы Россиысь Писательёслэн огазеяськонзы утыны быгатйз совето вакытысь трос жечсэ, солэн

данэз ялан будэ. Кыллэн кужымез бадзым. Со валтэ но, жүтэ но.

## Калык писательёслэн лыдзы будйз

Йöскалык библиотекаын озы ик радъяськиз огазеяськонлэн юбилеелы сйзем чебер жыт. Отчы

1934-тй арын Удмуртиысь Писательёслэн огазеяськонзыны кивалтыны кутскыз Кедр Митрей. Собере биньгозыез кутйзы Игнатий Гаврилов, Афанасий Лужанин, Михаил Петров, Андрей Бутолин, Геннадий Красильников, Флор Васильев, Генрих Перевошиков, Александр Шкляев, Семён Самсонов, Олег Четкарёв, Егор Загребин. Берло 10 ар çоже огазеяськонэн кивалтэ Пётр Захаров.

люкаськызы огазеяськонлэн ёзчиосыз — шаерамы ульсь удмурт, зуч, бигер писательёс.

Соосты жечкылаз Тöролэн но Правительстволэн администрациенызы кивалтйсь Александр Журавлев, Кун Кенешлэн Тöроезлэн воштйисез Татьяна Ишматова, Печатья но ивор вöлмытонъя агентстволэн кивалтйисез Александр Валов но мукетъёс. «Калык поэт» ним сётэмын Удмуртиысь Писательёслэн огазеяськонзылэн кивалтйисезлы, «Инвожо» журналлэн валтйсь редакторезлы Пётр Захаровлы, тодмо удмурт кылбурчины, бардлы Владимир Котковлы, «Калык писатель» ним — прозаиклы, журналистлы, «Кизили» журналлэн азьвыл

валтйсь редакторезлы Ульфат Бадретдиновлы.

Россиысь Писательёслэн огазеяськонзылэн кивалтйисез Николай Иванов пусйиз: Удмуртиын Писательёслэн огазеяськонзы огсыр азинске.

Пумиськонэ люкаськемъёс тодазы вайизы Удмуртиысь Писательёслэн

огазеяськонзылэсь 90 арьем сюресэ но. Нимысьтыз презентация дасям Йöскалык библиотека.

Писательёслэн огазеяськонзы сярсь туж тунсыко мадиз куке-соку ачиз но соин кивалтэм тодосчи, писатель Александр Шкляев.

— СССР-ысь Писательёслэн огазеяськонзы но, Удмуртиысь Писательёслэн огазеяськонзы но кылдытэмын вал писательёслэсь пöртэм группировкаоссэс огазеян понна, — шуэ Александр Григорьевич. — Москваын гинэ соку писательёслэн 30 пала группаоссы, пе, вал, ваньзылэн асьсэ идеологизы. Быдзым писатель Максим Горький вала вал, соосты огазеяно шуыса...

Зэмзэ вераса, Удмуртиысь Писательёслэн огазеяськонзы кылдытэмын вал вазыгес, 1927-тй арын, вакчиятыса нимаськыз ВУАРП. Сое кылдытйзы К. Герд но Т. Борисов. Но со вал удмурт сямен гожъяськись писательёслэн гинэ огазеяськонзы. Нош кулэ вал удмурт но, зуч но писательёсты çош карыны. СССР-ысь Писательёслэн союззы кылдэм бере ини сыçe огазеяськон кылдйз Удмуртиын но.

Пусъеме потэ, огазеяськонзэ кылдытыны выриз ай 1921-тй арын Григорий Верецагин.

1928-тй арын Казане лыктэ Владимир Маяковский. Со доры пöртэм выжыосысь адымиос лыкто, шуо: Владимир Владимирович, ми берыктйм тйльсьтыд «Левый Марш» кылбурдэс... Тйни озы писательёсты огазеян сярсь малпан пумен-пумен улонэ пыçаз. 1934-тй арын СССР-ысь писательёслэн съездзы вал. Отын споръяськонъёс дыръя тодмо писатель Алексей Сурков (нялтас вераса, со Удмурт шаерлэн нимыныз СССР-ысь Верховной Советэ депутатэ бырйылэмын вал) шуиз: «Рано сбрасывать Маяковского с парохода современности. Придёт время, и его стихи перейдут в дивизионные газеты». Та чуръёс туннэ нуналлы но тупало... — шуиз Александр Григорьевич.

Россиысь Писательёслэн огазеяськонзыны кивалтйсь Николай Иванов пусйиз: тыршоно котырамы егит авторъёсты но кыскыны. Пумиськон дыръя ик йылпумъянъёс лэсьтэмын вал «Рувики» Интернет-энциклопедилэн писательёслы сйзем конкурсэзлы но школьникъёс пöлын радъям «Этот день мне запомнится на всю жизнь» эссеосын конкурслы.

Ужрад йылпумъяськыку, Россиысь Писательёслэн огазеяськонзылэн кивалтйисез Николай Иванов огазеяськонлэсь флагзэ сётйз Удмуртиысь Писательёслэн огазеяськонзылэн кивалтйисезлы Пётр Захаровлы. Табере, пе, Удмуртиен кусыпъёс эшшо юмалозы.

Юбилей ортчиз, лэсьтоно ужъёс трос!

Елена МИННИГАРАЕВА